


А.П. ЧЕХОВ



ТЭ СОВЭС
КАМЭЛПЭ
ВАНЬКА

ГОСЛИТИЗДАТ · 1934



Лылвары—социалистическонэ газетскэ
БИБЛИОТЕКА ВАШ НАБУТ ЛЫЛВАРЭ ГИНЫБНАРИСКЭ

А. П. ЧЕХОВ

ТЭ СОВЭС КАМЭЛПЭ

★

ВАНЬКА

ПИРИЛЫДЖИЯ А. СВЕТЛОВО

Г.П.Б. в Либр.

Ц. 1934 г.

Акт. №

Инв. №

172

ГОСУДАРСТВЕННО ИЗДАТЕЛЬСТВО
ПИРО ХУДОЖЕСТВЕННО
ЛИТЕРАТУРА

1934

17-я фабр. нац. книги ОГИЗ'а РСФСР треста «Полиграфкнига»
Москва. Шлюзовая наб., д. № 10.

ТЭ СОВЭС КАМЭЛПЭ

Рат. Нянька Варя, раклори бэрша дэшутрин
лакэ, кунынэ куна, дрэ сави пашло раклоро и
набут шундлэс багала:

Баю-баю-баю
Мэ гилори тукэ сбагава.

Ангил дэвлэстэ хачёла зэлэно лампадка; пир-
дал сари штуба екхэ вэнглостыр жыко вавир
вэнгло тырдэлапэ шэло, прэ саво убладэ пелёнки
и барэ калэ холова. Э лампадкатыр пасёла про
пато баро зэлэно пятно, а пелёнки и холова
чюрдэна длэнга тени про бов, куна, прэ Варь-
катэ... Коли лампадка мигинэ, пятно и тени
отджидёна и приджяна дро движениё, сыр э бал-
валятыр. Дрэван тато. Кхандэла ярмяса и тыра-
хэнгирэ товароса.

Раклоро ровэла. Ёв кхинья э роибнастыр, нэ
уса инкэ ровэла, и наджындло, коли ёв улэлапэ.
А Варькакэ камэлпэ тэ совэл. Лакирэ якха за-

кэрнапэ, шэро тырдэла дро низо, мэн дукхала. Ёй на могискирла тэ пошэвелин ни векэнца, ни уштэнца, и лакэ здэлапэ, со лакиро муй вышутия и кэрдяпэ каштуно, со шэро ачъя тыкно, сыр булавкакиро шэроро.

— Баю-баюшки-баю,— багала ёй,— тукэ кхур-мори кэравава...

Дро бов дэла годла свэрчко. Дрэ пашылатуны штуба, пало удэра суто хулай и подмастерьё Афанасиё... Куна тангипнаса скрипинэ, кокори. Варька набут шундлэс багала,—и саро адава стховэлапэ дрэ екх музыка, сави адякэ гудлэс тэ шунэс, коли пасёса дрэ пасибнытко. Акакана жэ адая музыка только холякирла и пхарэс тасавэла, пало одова, со ёй втрадэла дро соибэ, а тэ совэс нашты; коли Варька, на дэ дэвла, засовэла, то о хулая примарна ла.

Лампадка мигинэ. Зэлэно пятно и тени приджяна дро движэниё, джяна дро пашоткэрдэ Варькакирэ якха, и дрэ лакири пропаш суты годы стховэнапэ туманна грезэ¹. Ёй дыкхэла калэ облаки, савэ традэнапэ екх палэ екхэстэ пиро болыбэ и дэна годла, сыр тыкнинько раклоро. Нэ окэ запхурдыя балвал, хасинэ облаки и Варька дыкхэла бугло шоссе² учякирдо жыдконэ блатаса; пиро шоссе тырдэнапэ обозэ, джяна мануша гонэнца про думэ, лыджянапэ палэ и ангил савэ-

¹ Грэзэ — дыкхибэна, мечтании

² Шоссе — дром, упралыпэ савэскиро узорьякирдо барэнца, шшебнёса или асфальтоса.

то тени; пир сарэ дуй строны пирдал шылало, холямо тумано дыкхнэ сы вэша. Екхатыр мануша гонэнца и тененца пэрна прэ пхув дрэ жыдко блата.— „Ваш со адава?“ — пучела Варька.

— „Тэ совас, тэ совас!“ — ракирна ёнэ лакэ. И ёнэ засовэна зоралэс, сутэ гудлэс, а про телеграфна сутуги бэштэ кораки и сороки, дэна годла, сыр тыкнинько раклоро, и камэн тэ розджингавэн лэн.

— Баю-баю-баю, а мэ гилори сбагава...— багала набут шундлэс Варька и ужэ дыкхэла пэс дрэ калы, дрэван таты штуба.

Про пато рисёла лакиро покойно дад Ефимо Стёпаново. Ёй на дыкхэла лэс, на шунэла, сыр ёв катынэпэ э духатыр пиро пато и стонинэ. Лэстэ, сыр ёв ракирла, „розгрызиндяпэ грыжа“. Дукх адыкэ бари, со ёв на могискирла тэ про-ракир ни екх лав и толькы втырдэла дрэ пэстэ фано и отмарла дандэнца барабанно дробь:

— Бу-бу-бу-бу...

Дай Пелагея прастандыя прэ рангиро кхэр ко рая тэ пхэнэл, со Ефимо мэрла. Ёй гара ужэ угыя, и лакэ трэби ужэ тэ рисёл. Варька пашлы про бов, нанэ суты и пришунэлапэ кэ дадэскиро „бу-бу-бу“. Нэ окэ шундло сы, со кон-то подгыя ко кхэр. Адава о рая прибичыдэ тэрнэ састыпнытконэс, саво явья кэ ёнэ э форостыр дро гости, шундло сы сыр ёв кашлинэ и захандэла удэра.

— Захачкирэн э яг,— ракирла ёв.

— Бу-бу-бу...— отпхэнэлапэ Ефимо.

Пелагея чурдэлапэ ко бов и родэла черэпко э ягитконэнца. Мэнта сыс сарэ штыл. Састыпнаскиро, дыяпэ дрэ кысык и захачкирдя пэскири ягитко.

— Екхатыр, мро дароро, екхатыр,— ракирла Пелагея: чурдэлапэ яври э кхэрэстыр и, набут смэки, явьа огаркоса.

Чямьа э Ефимостэ розова, якха блестинэна, и дыкхэна сыр-то дрэван острэс, сыр хай Ефимо дыкхэла насквозь и кхэр и састыпнытконэс.

— Нэ. Со? Со ту адава вздуминдян? — ракирла састыпнытко, збандёви кэ ёв.— Эге! Гара ли адава тутэ?

— Со? Тэ мэрав, мрэ рая, явьа времё... Тэ на явав мангэ джидэса...

— Явэла дылныпэ тэ ракирэс... Высастякираса!

— Адава сыр тумэнгэ камэлпэ, парикирава¹ тумэн, мрэ рая, а только амэ поласа... Коли мулыпэ явьа, со уж адай.

Састыпнаскиро пашыл дэшупандж мэнты возинэпэ Ефимоса; отэнчя г'аздэлапэ и ракирла:

— Мэ ничи на могискирава тэ кэрав... Тукэ трэби дрэ насвалыпнаскири тэ джяс, одой тукэ операцыя кэрна. Екхатыр жэ джя... Бисарэскиро джя! Набуткица поздно, дрэ насвалытко ужэ сарэ сутэ, нэ адава ничи, мэ тукэ лылоро дава. Шу-нэса?

— Мро дадоро, тэ прэ сожэ ёв джяла? — ракирла Пелагея. — Амэндэ нанэ грэс.

¹ Парикирава — Благодарю

— Ничи, мэ помангава э ран, ёнэ дэна грэс.

Састыпнытко угыя, мэлэлы мурдыя, и отэнчя шунэлапэ „бу-бу-бу“...

Смэки пашмардо, ко кхэр кон-то подджяла. Адава о рая прибичыдэ урдэн, соб тэ джяс дрэ насвалытко. Ефимо скэдэлапэ и джяла...

Нэ окэ явья лачё, парно злоко. Пелагэя нанэ кхэрэ: ёй гыя дрэ насвалытко тэ угалёл, со кэр-лапэ Ефимоса. Кай-то ровэла тыкно раклоро, и Варька шунэла, сыр кон-то лакирэ глосаса багала:

— Баю-баю-баю, а мэ гилори збагава...

Явья Пелагея; ёй тховэла прэ пэстэ трушыл и шэпчинэ:

— Ратяса вправиндлэ лэскэ, а ко злоко дэв-лэскэ о ди отдыя. Царство болыбнаскиро, вечно покоё... Ракирна, позднэс заухтылдэ... Трэбинэ сыс гарыдыр...

Варька джяла дро вэш и ровэла одой. Нэ екхатыр кон-то марла ла пиро шэро адасавэ зорьяса, со ёй стукинэпэ чэкатэса пирэ брэза. Ёй газдэла якха и дыкхэла ангил пэстэ хулас — тырахарис.

— Ту со ж адава, паршыво? — ракирла ёв. — Чя-воро ровэла, а ту суты?

Ёв дукханэс трэнскирла ла пало кан, а ёй газдэла о шэро, кунынэ куна и багала пэскири гилы. Зэлэно пятно и тени э холовэндыр и пелёнкэндыр кунынэнапэ, мигинэна лакэ и сыго отэнчя закэдэна лакири годы. Отэнчя ёй дыкхэла шоссе, учякирдо жыдконэ блатаса. Мануша гонэнца продумэ и тени распасинэпэ и зоралэс сутэ. Дыкхи прэ лэндэ, Варькакэ дрэван камэлпэ тэ совэл; ёй

пасёлас бы барэ камаибнаса, нэ э дай Пелагея джяла пашыл и традэла ла. Сарэ дуй ёнэ джяна дро форо тэ тэрдён прэ буты.

— Подэнте милостинка ваш дэвлэскэ! — мангэла э дай встречнонэндэ. — Сыкавэнте дэвлэскири милость, рая милосердна!

— Подэ адарик э чяворэс! — отпхэнэлапэ лакэ конэскири-то джиндлы глос. — Подэ адарик э чяворэс! — ракирла завир моло одоя жэ глос, нэ ужэ холямэс и резкэс. — Суты подло?

Варька ухтэла и, подыкхи пиро строны, полэла, дрэ со рэндо: ни дром, ни Пелагея, ни встречнонэн, а тэрды машкир штуба екх толькo хуланы, сави явья тэ почяравэл пэскирэ чяворэс. Грубо, буглэ психэнгири хуланы чяравэла и улэла чяворэс. Варька тэрды, дыкхэла прэ латэ и ду-жакирла, коли ёй чюрдэла тэ чяравэл. А пало фэнштры ужэ сининэ фано, тени и зэлэно пятно про потолок кэрдяпэ парнэдыр. Сыго злоко.

— Лэ! — ракирла хуланы, закэри про колын о гад. — Ровэла. Галёв, якхало дынэ.

Варька лэла чяворэс, тховэла лэс дрэ куна и отэнчя кунынэ. Зэлэно пятно и тени понабут хасэна, и ужэ нанэ конэскэ тэ джял дрэ лакиро шэро и тэ туманин э годы. А тэ совэл камэлпэ, сыр и гарыдыр, дрэван камэлпэ! Варька тховэла шэро прэ кунакиро краё, кунынэпэ сарэ штал-тоса, соб тэ пиризорьякир о соибэ, нэ о якха уса таки закэрнапэ и о шэро кэрлапэ пхарэса,

— Варькэ, захачкир о бов! — роздэлапэ пало удэра хуласкири глос.

Акана ужэ трэби тэ уштэс и тэ прилэспэ палэ буты. Варька ачявэла куна и прастала дрэ штала пало кашта. Ёй радо. Коли прастаса или псирэса, тэ совэс ужэ на адыкэ камэлпэ, сыр бэшы. Ёй анэла кашта, хачкирла бов и расправинэлапэ лакиро одервеневшо муй и кэрлапэ ясно дрэ годы.

— Варькэ тхов о пибнаскиро! — дэла годла э хулары.

Варька пхаравэла кхина, нэ только управинэпэ тэ захачкир ла и тэ тховэл дро пибнытко, сыр шунэлапэ нэво припхэныбэ:

— Варькэ, вышулав хуласкэ колошы!

Ёй бэшэла про пато, шулавэла колошы и думинэ, со шукир бы тэ тховэс шэро дрэ хор колоша и тэ посовэс дрэ латэ набуткица... И екхатыр колоша барьёла, шулёла, пхэрдякирла пэса сари штуба, Варька равэла э вастэндыр шшотка, нэ екхатыр гыздэла о шэро, вылучкирла якха и камэл тэ дыкхэл адыкэ, соб предметэ на баринэ и на двигиндлэпэ дрэ лакирэ якха.

— Варькэ, вымор упрал э лестница, а то э запхэныбнытконэндыр ладжяво!

Варька морла лестница, укэдэла штубы, отэнчя хачкирла вавир бов и прастала дрэ банза. Буты бут, нанэ ни екх мэнта свободно.

Нэ ничи адыкэ нанэ пхаро, сыр тэ тэрдэс прэ екх штэто ангил кухонно скаминд и тэ шулавэс пхувитка. Шэро тырдэла ко скаминд, пхувитка рябинэна дро якха, чюри пэрла э вастэндыр, а пашыл псирэла грубо, холямы хулары э закэрдэ баенца и ракирла адыкэ шундлэс, со кудунякир-

лапэ дро кана. Адыкэжэ бари мэнька сы тэ при-
служынэс палэ хабэ, тэ морэс, тэ сывэс. Исы
мэнтэ, коли камэлпэ, ни прэ со на дыкхи,
тэ пэрэс про пато и тэ совэс.

Дывэс проджяла. Дыкхи, сыр калёна фэнштры,
Варька стасавэла пэскэ деревенеюшшы виски и
салапэ, кокори на джины соскэ. Бельвилитко
калыпэ ласкинэ лакирэ якха савэ закэрнаэпэ и
дэла лакэ сыго, зорало соибэ. Бельвеляса ко ху-
лая явена гости.

— Варькэ, тхов пиибнаскиро! — дэла годла ху-
ланы.

Пиибнаскиро э хуланэ набаро, и соб тэ чяля-
кирэс э гостен драбэса, приджялапэ тэ тат-
кирэс лэс молы пандж. Коли отпъена о драб,
Варька тэрдэ пхэрдо мардо прэ екх штэто, дык-
хэла прэ гостендэ и дужакирла припхэныбэна.

— Варькэ проста кин трин стэклы бэра!

Ёй срискирлапэ штэтостыр и камэл тэ прастал
сыгыдыр, соб тэ протрадэл о соибэ.

— Варькэ, праста палэ бравинта! Варькэ, кай
штопоро? Варькэ, ошулав э мачес!

Нэ окэ о гости угыне; яга мурдякирнапэ; ху-
лая пасёна тэ совэн.

— Варькэ, кунынэ чяворэс! — роздэлапэ пос-
леднё припхэныбэ. Дро бов дэла годла сверчко;
зэлэно пятно про потолок и тени э холовэндыр
и пелёнкэндыр, отэнчя джяна дро пашоткэрдэ
Варькакирэ якха, мигинэна и туманинэна лакэ шэро.

— Баю-баю-баю, — багала ёй, — а мэ гилори
збагава...

А чяворо дэла годлы и кхинёла э годлатыр. Варька отэнчя дыкхэла мэлало дром, манушэн э гонэнца, Пелагея, дадэс Ефимос. Ёй саро полэла, сарэн угалёла, нэ пирдал пашсунэ ёй на могискирла только нисыр тэ полэл одоя зор, сави спхандэла ла пиро васта и пиро гэра, тасавэла ла и мешынэ лакэ тэ дживэл. Ёй обдыкхэлапэ, родэла адая зор, соб тэ уджял латыр, нэна латхэла. Ёй тховэла сари пэскири зор и зрениё про одова, соб тэ на засовэл, дыкхэла дро вэрхо про мига-лошшэ зэлэно пятно, пришунэлапэ ко годлыпэ и латхэла ворогос, саво мешынэ лакэ тэ дживэл.

Адава ворого—чяворо.

Ёй салапэ. Ёй дивисолапэ: сыр адава гарыдыр ёй на могискирдя тэ полэл адасаво пустяко? Зэлэно пятно, тени сверчко тожэ, здэлапэ, санапэ и дивисона. Хохано представлениё облэла Варька. Ёй уштэла прэ со сыс бэшты и буглэс саи на закэри якха, проджялапэ пирэ штуба. Лакэ шукар и шшекотно дрэ годы, со ёй екхатыр явэла бичяворэскиро, саво спхандя ла пиро васта и гэра... Тэ умарэс чяворэс, а отэнчя тэ совэс, тэ совэс, тэ совэс...

Саи, Варька подчёрлапэ кэ куна и збандэла ко чяворо. Коли затасадя лэс, ёй екхатырэ пасэла про пато, салапэ э радостятыр со лакэ могискирдо тэ совэл, и пирдал мэнта суты зоралэс, сыр мулы...

ВАНЬКА

Ванька Жуково, енябэршытко раклоро сьс отдыно трин чёна одолэскэ палэ дро сыкляибэ тырахарискэ Аляхиноскэ. Дрэ адая рат тэло свэнко Ванька на пасия тэ совэл. Ёв дужакирдяпэ, коли хулая и бутярья угынэ дрэ кхангири, дорэстя хулангирэ шкопостыр душлори черниленца, вастывари пхуранэ порэса и, ростходя ангил пэстэ замэлалякирды бумага,— лья тэ чинэл. Ангил одова, сыр тэ вылыджял пэрво буква, ёв на екх моло даранэс обдыкхьапэ про удэра и фэнштры, чюрдыя якхэнца про покалымэ дэвлэстэ, пир дуй строны савэстэ тырдынэпэ полки колодкэнца, и хор дья гондя. Бумага сьс пашлы прэ бэшыбнаскиро, а кокорó ёв тэрдо сьс ангил бэшыбнаскиро про чянга.

„Камло папу, Константино Макарычёл! — чиндя ёв — чинава тукэ лыл. Свэнкоса тумэн и камам тукэ саро э дэвлэстыр. Нанэ мандэ ни дадэс, ни даёрья только ту мандэ екх ячьянпэ“.

Ванька пирильдгия якха прэ калы фэнштра, дрэ сави дыкхны сыс лэскири мололы, и пэскэ дрэ годы, ёв джидэс выкхардя пэскирэ папус, Константино Макарычэс, саво бутякирдя ратитконэ раххибнариса ко рая Жыварёвэ. Адава жэ тыкнинько, шуко, нэ дрэван джидо пхуроро 65 бэршытко, сабнаскирэ муеса и матэ якхэнца. Дывэсэ ёв суто дрэ манушытко или лыджяла сабнытка ракирибэна бутярненца, савэ кэравэна хабэ, раты жэ уридо дро бугло постын, псирла пашыл кхэр и марла дрэ пэскири пхал. Пал лэстэ, змэки шэро, псирла пхураны Каштанка и джюкэл Вьюно, прокхардо адыкэ пал пэскиро кало цвэто и длэнго сыр ласкатэ трупо. Адава Вьюно дрэван сарэнца гинэлапэ и прэ сарэндэ екхитко камлыткэс дыкхэла, сыр прэ пэскирэндэ, адыкэ и прэ чюжонэндэ, нэ нанэ никонэстэ дрэ патыв. Тэл лэскиро почтениё и тихима гарадэла холы. Никон фэдыр лэстыр на джинэл тэ подчёрпэ и тэ ухтылэл палэ гэрой, тэ закэдэлпэ дро леднико, или тэ чэрэл гаджестыр кагня. Лэскэ на екхвар отмарнас палатунэ гэра, молы дуй лэс ублавэнас, кажно курко марэнас жыко мулыпэ, нэ ёв кажно моло отджидёлас.

Акана, о папу, галёв тэрдо пашыл порты дыкхэла про ярка лолэ гавитконэ кхангирьякирэ фэнштры, марла екхэ гэраса пирэ вавир, и салапэ кхэрытконэ бутярненца. Лэскири марибнытко пхал подпхандлы кэ кустык. Ёв марла вастэса пиро васт, ёжынэпэ шылыпнастыр и, пхурэ сабнаса тасавэла то екха, то вавря бутярня.

— Тэ посунгас киркори амэнгэ со-ль — ракирла ёв, адай жэ подтхови гаденгэ пэскири табакерка.

Гадя сунгэна и чихинэна. Папускэ адалэстыр кэрлапэ дрэван шукар и ёв зачивэлапэ джидэ сабнаса и дэла годла.

— Отрискир, примразыя!

Дэна тэ сунгэн э кирки и джюклэнгэ. Каштанка чихинэла, крэнцынэла шэрэса и обиженно отджяла дрэ стропа. Вьюно жэ э почтительносты-тыр на чихинэ и крэнцынэ порьяса. А дывэс лачё. Дро фано штылыпэ, ёв сы прозрачно и свежо. Рат калы, нэ сы дыкхно саро гав парнэ крышэнца и тхувэса, саво джяла трубэндыр, дрэвы пору-повякирдэ инеёса, сугробэ. Саро болыбэ зачидо чергэненца, савэ отджидякирна пхув, и млечно дром шукар дыкхно, хай ангил свэнко лэс вы-мордэ и покхоснэ ивэса...

Ванька дья гондя, эмэкья пор дрэ чернилы и чиндя дурыдыр:

„А атася мангэ инкэ попяя. Хулай вытырдыя ман пало бала прэ грэда и отгандя шпандырёса пал адава, со кунындем лэнгирэ чяворэс дрэ куна и наками засутём. А про курко хулапы пхэндя мангэ тэ ошулавав лондо мачё, а мэ лыёмпэ по-рьятыр, а ёй лыя мачё и лэскирэ шэрэса лыя ман дро муй тэ пэкавэл. Бутярья мандыр санапэ, би-чявэна палэ бравинта и затховэна тэ чёрав ху-ландыр граставицы, а хулай марла соса попэрла. А хабэ нанэ нисаво. Злокоса дэна маро, дро пашдывэс кхурми и кэ бельвель тожэ маро, а соб драб или ярми, то хулая кокорэ пхаравэна.

А тэ совав мангэ припхэнэна дро трэмо, а коли лэнгиро чяворо ровэла, то мэ на сом суто, а кунынава куна. Дрэван камло папу, кэр дэвлэскиро рэндо, лэн ман адатхыр кхэрэ дро гав; нанэ мандэ бутыр нисави зор... Пэрава тукэ дро гэрорья и лава саро вэко дэвлэскэ тэ мангавпэ, улыджя ман адатхыр, а то мэрава“...

Ванька побандякирдя муй, покхостя намордэ вастэса якха и зарундя.

„Мэ лава, тукэ кирки тэ триинав, — чиндя ёв: — дэвлэс тэ мангавпэ, а коли со, то мар ман сыр Сидоровонэскирэ бузня. А коли думинэса, со мангэ буты на явэла, то мэ, сыр дэвлэс помангава приказчикос соб тэ прилэл тыраха лэскэ тэ шулавав, али прэ Федькаскиро штэто дро под паски джява. Папулэ мро камло, нанэ нисави зор, екх мулыпэ ачъяпэ. Камьём прэ зал дро гав тэ прастав, нэ тыраха нанэ, мразэндыр дарава. А коли выбарьевава, то пало адава само лава тут тэ чяравав и дрэ обида тут никонэскэ на дава, а мэрэса лава пало упокоё тыро ди про одова свэто то мангав, са екх сыр палэ датэ Палагэятэ“.

„А Москва форо баро. Кхэра уса райканэ и грэн бут, а бакрэн нанэ и джюкэла нахолямэ. Чергэняса адай чявэ на псирна и про клиросо тэ баган никонэс на мэкэна, а екхвар мэ дыкхьём дрэ екх банза, прэ фэнштра, нанглорэ бикнэнапэ лескаса и прэ савэ ками мачендэ, дрэван тиминитка, сы адасаво екх нангло, со пудовонэ сомос вырикирла. И дыкхьём банзы, кай карэдыня бикнэнапэ савэ ками, сыр раскирэ, адякэ со'га-

лѣв шэл састэ мол кажно... А дрэ масунэ банзы и тетеревы, и рябцэ, и зайцэ, а дрэ савэ штэты лэн марна, ваш адава бикныбнарья на ракирна“.

„Камло папулэ, а коли рандэ авэла ёлка, лэ мангэ сувнякирды пэгэнд и дрэ зэлэны тыкнори гарав. Манг э райканятыр Ольгатыр Иганатьев-натыр, пхэн, со адава ваш Ванькаскэ“.

Ванька пхарэс дья гондя и утходяпэ дрэ фэнштра. Ёв взрипирдя, со палэ ёлка ваш рангэ псирлас дро вэш о папу и лэс лэлас пэса. Лачё сыс времё! И папу крякинэс, и мразо крякинэс, а дыкхи прэ лэндэ и Ванька крякиндя. Ангил адава сыр тэ чингир ёлка, папу потырделас пипка, длэнго сунгэлас кирки, саласпэ э пиримразымэ Ванькастыр... Тэрнэ ёлки, обкхудэ инеёса, тэрдэ сыр бы замулынэ и дужакирна, савьякэ лэндыр приджялапэ тэ мэрэл? Катыр на лыяпэ, пиро сугробэ урняла сыр балвал зайцо... Папу на могискирла, соб тэ надэл годла:

— Рикир, рикир... рикир! Ах ту бипорьякиро бэнг!

Счингирды ёлка папу тырдыя дро райкано кхэр, а одой прилэнаспэ тэ укэдэн ла... Бутэдыр сарэндыр псирдя пал латэ тыкнинько райканы Ольга Игнатъевна, савья камья зоралэс Ванька. Коли инкэ сыс джиды Ванькаскири дай Пелагея и бутякирдя ко рая дрэ штуба, Ольга Игнатъевна чярадя Ванькас гудлыпнаса и со на сыс со тэ кэрэл высыклякирдя лэс тэ гинэл, тэ чинэл, тэ гинэл жыко шэл и тэ кхэлэл кадрил. Коли жэ Пелагея мыя, Ванькас отбичядэ дрэ манушытко

ко папу, а папустыр дрэ Москва ко тырахари
Аляхино...

„Яв пал мандэ, мро камло папулэ,— чиндя
Ванька: дэвлэса мангава тут, лэ ман адатхыр. По-
тангискир ту ман, бибахталэс, а адай ман сарэ
марна, и тэ хав зоралэс камам, а тырдэла дро
гав адыкэ, со и тэ пхэнэс нашты, уса ровава. А
про дывэса о хулай колодкаса пиро шэро адыкэ
пэкадя, со мэ пыём и на джином сыр пригыём
дрэ годы. Хасибнаскиро миро джиибэ, джюкэла
фэдыр дживэна... А инкэ пиридэ поклоно Алё-
накэ, бангэ Егоркаскэ и шоляriskэ, а мири ба-
шаибнаскири никонэскэ на отдэ. Ачявапэ тыро
внуко Ивано Жуково, родно папу, яв пал
мандэ“.

Ванька стходя лыл и втходя лэс дро конверто,
саво киндя инкэ атася палэ гасприн... Подумис-
кири набут инкэ лыя пор обмэкья дро чернилы
и чиндя адресо:

„Дро гав папускэ“.

Отэнчя похарудяпэ подуминдя и причиндя инкэ
„Константин Макарычэскэ“. Лэскэ удьяпэ тэ чи-
нэл лыл и адалэстыр сыс мишто про ило, ёв
уридя стады и би постынэскиро дрэ екх гад
выухтя прэ гаса...

Дрэ банза мануша, савэн ёв распучья пхэндлэ
лэскэ, со лыла змэкэнапэ дрэ почтова яшшики,
а яшшикэндыр розлыджянапэ пирэ сари пхув прэ
почтовонэ грэндэ э матэ шоляренца. Ванька до-
прастандыя жыко пэрво почтово яшшико и змэ-
кья дорого лыл дро яшшыко.

Промэки мардо ёв зоралэс засутя гудлэ на-
деяса... Лэскэ дыкхьапэ дро сунэ бов. Про бов
бэшто сыс папу, змэки пирангэ г'эра и гинэла лыл
бутяренгэ. Пашыл бов псирла Вьюно и крэнцы-
нэла порьяса...

Редактор А. Германо
Техн. редактор К. Полонская
Обложка Л. Зусмана

*

Сдано в набор 20.VI.1934
Подп. к печати 28.VII.1934


*

ОГИЗ 164, Хн-61. Тираж 500 экз.
Зак. тип. 2591. Форм. бум. $72 \times 110^{1/32}$
 $5/8$ п. л. по 44650 зн. в листе
Уполномоч. Главлита В-85263

Professor A. L. ...
Tate Professor ...
O'Connor ...

...
...
...

...
...
...
...
...



Ц. 10 коп.

М 344327

Цыг.
2-105#2

А. П. ЧЕХОВ
СПАТЬ ХОЧЕТСЯ
—
ВАНЬКА

На цыганском языке

ГОСЛИТИЗДАТ